



10. januar 2011

UPA 2011/38

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Kalaallit Nunaanni aaqqissuuseqqinnerup kingorna kommuniusimasut tamarmik minnerpaamik qinikkamik ataatsimik nunami sumiiffiup sinniisaatut kommunalbestyrelsini ilaasortaataqarnissaat anguniarlugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

### Tunngavilersuut

Kommunelbestyrelsinut il. il. qinersisarnerit pillugit Inatsisartut inatsisaanni nr. 10, 31. oktober 1996-imeersumi § 5, imm. 1-imi allaqqavoq kommunalbestyrelsimut qinersinermi kommunit tamarmik qinersivik *ataasiupput*. Kommunini suliaasaqarfiit aaqqissuuteqqinneqarnerat pillugu Inatsisartut inatsisaanni nr. 14, 19. november 2007-imeersumi § 4, imm. 2-mi allaqqavoq, Kommuniusimasuni kommunimi nutaami ilaasuni ataasiakkaani tamani kommunip nutaap kommunalbestyrelsiani ilaasortat ilaat ataaseq nunami sumiiffiup sinniisaatut qinigaassasasoq. Inatsisit atuuttut pineqartut imminnut naapertuutinnigillat.

Pissutsit sungiusimasagut qimallugit nunatsinni pisortat ingerlatsiviini aaqqissuuseqqinneq nutaaq sanarfivarput. Kommunit kattussorneqarput, kommunini qinikkat kiisalu nunaqarfinni aqutsisunut ilaasortat ikilisinneqarput. Sumiiffinni kommuniusimasuni toqqaannartumik inuit sullinneqarnerat allannguuteqarpoq, nunap immikkoortuini qitiusoqarfinnik sisamanik pilersitsinikkut kommunit anginerusut pilersinneqarmata.

Allatut oqaatigalugu, qanimut oqartussaaqataaneq allannguallatsipparput, qanimut sullisineq allannguallatsipparput, illoqarfeqatigiittut sumiiffippat kisiat aallaavigalugu eqqarsariaaseqarneq allanngortipparput, inuttut ataasiakkaatut atukkavut illoqarfinni allani inuit atugaannut naleqqussarpagut il.il.

Taamatut aaqqissuuseqqinnerup aamma malitsigissavaa kommunimi pineqartumi qanoq qinigaatigineq aallaavigalugu illoqarfiit ilaanni qinikkamik aallaartitaqanngitsuissinnaaneq periarfissaalissamat. Tamanna oqartussaaqataanermik annertuumik annaasaqaa-taasussatut isigineqartariaqarpoq, ilisimavarpummi inuiaqatigiit nunatsinni siamma-sissumik nunasiortorsimavugut - ilaatigullu illoqarfiit kommuniusimasut avinngarusi-mallutik inissisimanagerat aallaavigalugu qinikkatut qanimut malinnaaniarnermut aporfui-lersinnaasartoq.

Iloqarfiit kommuniusimasut pinngitsooratit minnerpaamik qinikkamik ataatsimik aallartitaqartussaanagerat oqallisissaqqippoq, tamanna oqartussaaqataanagerup millisarneqanngin-nissaannik qulakkeerinniinnarani, aamma sumiiffinni ataasiakkaani ilisimasaqassutsip pingaaruteqarneranik inuillu qinikkanut qanimut attaveqarsinnaanerannut iluaqusiisus-saavoq.

Illoqarfiit anginerit inuttunerusullu qinikkanik amerlasuunik aallartitaqarsinnaanerit periarfissagissaarnerusartoq tamatta ilisimavarput. Tamanna piffissap ilaanni illoqarfiit mikinerusut periarfissaannik mattussisooqqunagu kommuniusimasut tamarmik qinikkamik aallartitaqarnissaannik minnerpaaffiliinikkut qulakkeerinnissinnaaneq periarfissaallu arpoq.

Nunarsuarmi qeqertat annersaanni inuiaqatigiit siammasissumik nunasiortorsimanerput aamma pisortat ingerlatseriaasiatigut nunami pissutsinut naleqqussakkamik aaqqiissuteqarnissaq pisariaqarpoq. Nunatsinni inuit tamarmik oqartussaaqataasutut misigalutik inooqataanissaat, isummersoqataanissaat tusaaneqartutullu misigisimanissaat peqataatitsinikkut anguneqartariaqartoq isumaqarnarpoq.

Nunatsinni angallannikkut periarfissat sumiiffiit ilaanni ajornakusooqaat aningaasarpas-suarnillu naleqarsinnaasarlutik, taamaammat allatut aaqqiissuteqarnissaq avaqqukkuminaappoq. Taamatut takisuuliornanga Inatsisartut isummersornissaat qilanaaralugu, oqallisissiaq saqqummiuppara.